

Harian Metro - 3/6/16

Bersama
Prof Dr Engku
Ahmad Zaki
Engku Atwi

Buah tangan istimewa balasan berpuasa

Ramadan sangat bermakna dalam kehidupan kita sebagai orang Islam. Ia datang sekali dalam setahun bersama keistimewaan dan ganjaran yang sangat besar.

Jika dapat dibuat perumpamaan, ketibaan bulan mulia ini samalah dengan kedatangan seorang tetamu istimewa bersama buah tangan atau hadiah khas untuk tuan rumah. Buah tangan itu sudah tentu diberikan kepada tuan rumah yang menyambut kedatangannya dengan

baik dan penuh ceria. Dialah yang dapat merasai kemanisan buah tangan itu.

Orang yang memandangnya secara endah tak endah, sudah tentu tidak diberikan buah tangan itu. Dia tidak dapat merasai kemanisannya, bahkan berasa tidak selesa dan selalu saja mengeluh. Sebab itulah kita seharusnya menanti dan menyambut Ramadan dengan pengharapan, rasa gembira dan penuh syukur.

Junjungan mulia Rasulullah SAW berdoa

setiap kali datangnya Rejab: "Ya Allah! Berkatilah kami dalam bulan Rejab dan Syaaban ini dan sampaikanlah kami ke bulan Ramadan."

Ramadan menghimpunkan pelbagai keistimewaan. Tentu sangat rugi sekiranya kita tidak meributnya dengan kerajinan, kesungguhan dan keikhlasan.

Biarlah pada kali ini kita dapat melaksanakan amal terbaik, sebelum dipanggil untuk menghadap Ilahi pada bila-bila masa saja. Kita perlu memperbanyakkan

amalan pada Ramadan. Siang kita menjalani ibadat wajib iaitu berpuasa manakala malam kita menghiasinya dengan ibadat sunat seperti solat Tarawih, witr dan tahajjud, selain tadarus al-Quran dan iktikaf.

Bukankah Allah menjanjikan pahala satu amalan wajib pada Ramadan menyamai 70 amalan wajib atau fardu pada bulan lain dan satu amalan sunat pula menyamai satu amalan wajib pada bulan lain?

Sepatutnya peluang dan tawaran istimewa yang

Allah sediakan sebulan pada Ramadan menjadi perangsang bagi kita untuk berlumba-lumba mengumpul pahala, mengejar reda-Nya, menadahkan rahmat dan keampunan daripada-Nya.

Perlu juga diingatkan di sini, di samping berpuasa dan mengerjakan ibadat lainnya, kita jangan mencuaikan tugas diamanahkan. Pekerjaan harian perlu dilakukan dengan sempurna seperti biasa.

Janganlah menjadikan puasa sebagai alasan dan penghalang bagi kita untuk

bekerja dengan penuh komitmen dan ikhlas. Sebenarnya, pekerjaan ataupun aktiviti baik apabila dimiatkan ikhlas kerana Allah akan bernilai menjadi suatu ibadat. Amalan ibadat pula akan diberikan ganjaran sehingga beratus-ratus kali ganda.

Jadi, mengapa kita harus mensia-siakan detik berharga sepanjang Ramadan dengan tidur dan bermalas-malasan sepanjang hari?

Penulis ialah profesor di UnisZA